



吾學編

十六

皇明天文述

地理述

上

下

皇明地理述

藏書

皇明天文述序

皇明

高皇久在兵間熟知乾象既登宸極召集名家覽  
搜往牒設官制象并合華夏曲算旁占綜略全古  
以故二統相持則徵諸七政三曆相讎必協於五  
紀敬天勤民蓋孜孜焉矧其災祲一譴側身脩省  
符瑞屢臻虛心式教雖堯欽曆象舜在璣衡不是  
過矣若乃訓諭諸王飭戒羣將吉凶先見動中玄  
機疇人世業莫能測識豈非數由天悟理本神孚  
者耶 成祖 仁宗親承指授 列聖相傳憲章  
具在凡以答天心之仁愛顧民情之暑險者要不

止於觀變明時撫辰熈績而已議者乃謂保章挈  
壺名號徒存太史天官職業盡廢日月之交會氣  
朔之盈虛中節之緩急晝夜之短長似多違舛稍  
宜更定豈知位育叅贊之道燮理弼亮之功有不  
假於噐數藝術者歟述天文  
嘉靖己酉六月望日鄭曉識

皇明天文述序終

加木曹金刻

皇明天文述

吾學編第六十

海鹽鄭曉

吳元年太史院使劉基率其屬高翼等上戊申大  
統曆 上初在滁陽問韓國公漢有三傑佐平天  
下今徐達可方韓信公可兼張良蕭何乎對曰良  
智計絕人臣何敢望良若轉給餼或可勉效何耳  
上因問今世之士孰可擬良者對曰臣聞浙東朱  
濂能知象緯 上曰以吾所聞濂不如青田劉基  
上定括蒼孫炎以 上命聘基詣金陵特時占乾  
象佐行軍輒效以爲太史監太史令尋改太史院

使洪武元年改院爲司天監又置回回司天監是年十一月徵元太史院使張佑張沂司農卿兼太史院使成隸太史同知郭讓朱茂司天少監王可大石澤李義太監趙恂太史院監候劉孝忠靈臺郎張容回回司天監黑的兒阿都刺司天監丞迭里月實一十四人二年又徵元回回曆官鄭阿里等十一人至京議曆法占天象三年定爲欽天監掌察天文定曆數凡日月星辰風雨氣色之變率其屬而占候焉語在百官考十年三月 上與羣臣論天與日月五星之行翰林應奉傅藻典籍黃

麟考功監丞郭傳皆以蔡氏右旋之說對 上曰天左旋日月五星皆右旋二十八宿經也附天體而不動日月五星緯乎天者也朕自起兵以來與善推步者仰觀天象二十有三年矣嘗於天氣清爽之夜指一宿爲主太陰居是宿之西相去丈許盡一夜則太陰漸過而東矣由此觀之則是右旋此曆家亦嘗論之蔡氏謂爲左旋此則儒家之說爾等不折而論之豈所謂格物致知之學乎十三年秋 上坐武英西廡召見諸儒龔敷等言志上說曰老儒質直宜輔朕始置四輔官告太廟以

王本杜佑龔敷爲春官杜敷趙民望吳源爲夏官  
秋冬官缺令本等兼攝各司時令以燮陰陽十七  
年七月製觀星盤十月大明清類天文分野書成  
凡二十四卷詔賜秦晉 成祖周楚齊六府大抵  
欽天監十二分野分配州郡與唐天文志稍異貞  
觀中淳風撰法象志因漢書十二次度數始以唐  
之州縣配而一行以爲天下山河之象存乎兩戒  
北戒自三危積石負終南地絡之陰東及太華逾  
河並雷首底柱王屋太行北抵常山之右乃東循  
塞垣至穢貉朝鮮是謂北紀以限戎狄南戒自岷

山嶠冢負地絡之陽東及太華連商山熊耳外方  
桐柏自上洛南逾江漢攜武當荆山至于衡陽乃  
東循嶺徼達東甌閩中是謂南紀以限蠻夷故星  
傳謂北戒爲胡門南戒爲越門河源自北紀之首  
循雍州北徼達華陰而與地絡相會並行而東至  
太行之曲分而東流與涇渭濟瀆相爲表裏謂之  
北河江源自南紀之首循梁州南徼達華陽而與  
地絡相會並行而東及荆山之陽分而東流漢水  
淮瀆相爲表裏謂之南河故於天象則弘農分陝  
爲兩河之會五服諸侯在焉自陝而西爲秦涼北

紀山河之曲爲晉代南紀山河之曲爲巴蜀皆負  
險用武之國也自陝而東三川中嶽爲成周西距  
外方大伾北至于濟南至于淮東達鉅野爲宋鄭  
陳蔡河內及濟水之陽爲鄘衛漢東濱淮水之陰  
爲申隨皆四戰用文之國也北紀之東至北河之  
北爲邢趙南紀之東至南河之南爲荆楚自北河  
下流南距岱山爲三齊夾右碣石爲北燕自南河  
下流北距岱山爲鄒魯南涉江淮爲吳越皆負海  
之國貨殖之所阜也自河源循塞垣北東及海爲  
戎狄自江源循嶺徼南東及海爲蠻越觀兩河之

象與雲漢之所始終而分野可知矣於易五月一  
陰生而雲漢潛萌于天稷之下進及井鉞間得坤  
維之氣陰始達於地上而雲漢上升始交於列宿  
七緯之氣通矣東井據百川上流故鶉首爲秦蜀  
墟得兩戒山河之首雲漢達坤維右而漸升始居  
列宿上觜觶參伐皆直天關表而在河陰故實沉  
下流得大梁距河稍遠涉陰亦深故其分野自漳  
濱卻負恒山居北紀衆山之東南外接髦頭地皆  
河外陰國也十月陰氣進踰軋維始上達于天雲  
漢至營室東壁間升氣悉究與內規相接故自南

正達于西正得雲漢升氣爲山河上流自北正達于東正得雲漢降氣爲山河下流陬訾在雲漢升降中居水行正位故其分野當中州河濟間且王良閣道由紫垣絕漢抵營室上帝離宮也內接成周皆豕韋分十一月一陽生而雲漢漸降退及艮維始下接于地至斗建間始復與列舍氣通於易天地始交泰象也踰析木津陰氣益降進及大辰升陽之氣究而雲漢沉潛於東正之中故易雷出地曰豫龍出泉爲解皆房心象也星紀得雲漢下流百川歸焉析木爲雲漢末派山河極焉故其分

野自南河下流窮南紀之曲東南負海爲星紀自北河末派窮北紀之曲東北負海爲析木負海者以其雲漢之陰也唯陬訾內接紫宮在王畿河濟間降婁玄枵與山河首尾相遠隣顛頊之墟故爲中州負海之國也其地當南河之北北河之南界以岱宗至于東海自鶉首踰河戒東曰鶉火得重離正位軒轅之極在焉其分野自河會之交東接祝融之墟北負河南及漢蓋寒燠之所均也自析木紀天漢而南曰大火得明堂升氣天市之都在焉其分野自鉅野岱宗西至陳畱北負河濟南及



淮南皆和氣之所布也陽氣自明堂漸升遠於龍角曰壽星龍角謂之天關於易氣以陽決陰夫象也升陽進踰天關得純乾之位故鶉尾直建巳之月內列太微爲天庭其分野自南河以負海亦純陽地也壽星在天關內故其分野在商亳西南淮水之陰北連太室之東自陽盛之際亦巽維地也夫雲漢自坤抵艮爲地紀北斗自乾攜巽爲天綱其分野與帝車相直皆五帝墟也究咸池之政而在乾維內者降婁也故爲少昊之墟叶北宮之政而在乾維外者陬訾也故爲顓頊之墟成攝提之政

而在巽維內者壽星也故爲太昊之墟布太微之政而在巽維外者鶉尾也故爲烈山氏之墟得四海中承太階之政者軒轅也故爲有熊氏之墟木金得天地之微氣其神治于季月水火得天地之章氣其神治于孟月故章道存乎至微道存乎終皆陰陽變化之際也若微者沉潛而不及章者高明而過亢皆非上帝之居也斗杓之外廷陽精之所布也斗魁謂之會府陽精之所復也杓以治外故鶉尾爲南方負海之國魁以治內故陬訾爲中州四戰之國其餘列舍在雲漢之陰者八爲負海

之國在雲漢之陽者四爲四戰之國降婁玄枵以  
負東海其神主於岱宗歲星位焉星紀鶉尾以負  
南海其神主於衡山熒惑位焉鶉首實沉以負西  
海其神主於華山太白位焉大梁析木以負北海  
其神主於恒山辰星位焉鶉火大火壽星豕韋爲  
中州其神主於嵩嶽鎮星位焉近代諸儒言星土  
者或以州或以國虞夏秦漢郡國廢置不同周之  
興也王畿千里及其衰也僅得河南七縣今天下  
一統而直以鶉火爲周分則疆場舛矣七國之初  
天下地形雌韓而雄魏魏地西距高陵盡河東河

內北固漳鄴東分梁宋至於汝南韓據全鄭之地  
南盡潁川南陽西達虢略距函谷固宜陽北連上  
地皆綿亘數州相錯如繡考雲漢山河之象多者  
或至十餘宿其後魏徙大梁則西河合於東井秦  
拔宜陽而上黨入於輿鬼方戰國未滅時星家之  
言屢有明效今則同在畿甸之中矣而或者猶據  
漢書地理志推之是守甘石遺術而不知變通之  
數也又古之辰次與節氣相係各據當時曆數與  
歲差遷徙不同今更以七宿之中分四象中位自  
上元之首以度數紀之而著其分野其州縣雖改

隸不同但據山河以分爾晉天文志十二次分野始角亢者以東方蒼龍爲首也唐十二次始女虛危者以十二支子爲首也其以斗牛爲星分之首者日月星起於斗宿古之言天者由斗牛以紀星故曰星紀則星紀爲十二次之首而斗牛又二十八舍之首也本朝應運肇基而南京應天府寔星紀斗牛之分且與天地人三統之正相協自周以來數千年間帝王之運適符於今豈偶然哉是年欽天監博士元統言曆日之法其來尚矣今曆雖以大統爲名而積分猶授時曆數况授時曆法以

至元辛巳爲歷元至洪武甲子積一百四年以曆法推之得三億七千六百一十九萬九千七百七十五分經云大約七十年而差一度每歲差一分五十抄辛巳至今年遠數盈漸差天度擬合修改蓋七政之源有遲疾逆順伏見不齊其理深奧實難推演聞磨勘司令王道亨有師郭伯玉者精明九數之學若得此人推大統曆法庶幾可成一代之制蓋天道無端惟數可以推其機天道至妙因數可以明其理是理因數顯數從理出故理數可相倚而不可相違也 上是其言十八年冬築欽

天監觀星臺於鷄鳴山回回欽天監觀星臺因花  
雨臺二十年選疇人年壯解書者赴京習天文推  
步之術二十九年鑄渾天儀成二十六年欽天監  
監副李德芳言故元至元辛巳爲曆元上推往古  
每百年長一日每百年消一日永久不可易也今  
監正元統改作洪武甲子曆元不用消長之法考  
得春秋晉獻公十五年戊寅歲距至元辛巳二千  
一百六十三年以辛巳爲曆元推得天正冬至在  
甲寅日夜子初三刻與當時實測數相合洪武甲  
子元正上距獻公戊寅歲二千二百六十一年推

得天正冬至在巳未日午正三刻比辛巳爲元差  
四日六時五刻當用至元辛巳爲元及消長之法  
方合天道疏奏元統復言臣所推甲子曆元實與  
舊法相合略無差繆 上曰二統皆難憑只驗七

政交會行度無差者爲是自是欽天監造曆以洪  
武甲子爲曆元仍依舊法推算不用捷法二十七  
年召國子博士錢宰等脩書傳 上曰若輩知天  
象乎皆對不知 上曰朕觀天象自洪武初有黑  
氣凝奎壁乃文章之府朕甚異焉今年春暮黑氣  
始消文運興矣洪武中朝廷訪求通曉曆數數往

知來試無不驗者封侯食祿千五百石山東監生周敬心奏言國祚長短在德厚薄非曆數之可定三代有道之長固有定論三代而下深仁厚德者漢唐宋而已如漢高之寬仁繼以文景之恭儉昭宣之賢明光武之中興章帝之長者唐太宗之力行仁義宋太宗之誠心愛民是以有道之長國祚最短者莫如秦其次如隋又其次如五代始皇之酷虐煬帝之苛暴五代之窮兇是皆人事所致豈在曆數欽惟 聖上應天眷命掃滅胡夷救亂誅暴其功大矣然神武過於漢高而寬仁不及賢明過於太宗而忠厚不及是以御宇以來政教未敷四方未治伏乞效漢高之寬仁同太宗之忠厚法三代之稅歛則帝王之祚可傳萬世又何必問諸小技之人邪三十一年革回回監 仁宗即位作臺禁中 上時時登臺觀象洪熙元年正月賜大臣天元玉曆賦 太祖精於天文每以指訓子孫以故 成祖 仁宗皆知天象凡遣將行師諸王出塞遇有祲祥手勅緘諭 仁宗嘗見星變對大臣泣下未幾晏駕正統四年造渾天璿璣玉衡簡儀十一年令簡儀九道圭表壺漏並准南京作畧

影堂以便窺測調品十四年大統曆冬夏二至晝  
夜六十一刻景泰六年造簡儀銅壺成化十年冬  
鄱陽童軒知天文以太常少卿掌欽天監事弘治  
十一年訪世業疇人并諸能通曆象遁甲卜筮者  
正德元年七月五官監候楊源上疏言占候得大  
角及心宿中星動搖天璇天機天權星不明乞安  
居深宮絕遠遊獵罷弓馬嚴號令毋輕出入闕除  
內侍寵倖遊逸小人節賞賜止工役親元老大臣  
日侍講習詩書疏下禮部言源占候之言深切時  
弊源復疏言十月二十六日占候得連日霾霧交

作爲衆邪之氣陰冒於陽臣欺于君小人擅權爲  
下叛上引譬甚力劉瑾怒矯旨杖源三十釋之源  
又疏言自正德二年來一向占候得火星入太微  
垣帝座之前或東或西往來不一勸上宜思患  
預防瑾大怒罵源爾何官亦學爲忠臣復矯旨痛  
杖三十謫戍肅州行至懷慶卒十三年夏五月巳  
亥朔日食起復弗合日官周濂請驗交食以更曆  
元禮部員外郎鄭繼之上言曰歲差之法虞喜以  
五十年差一度久而驗之弗合也何承天以百年劉  
焯以七十五年僧一行以八十三年久而驗之又

弗合也許衡王恂郭敬以六十六年有餘以密矣  
今據其法步之又弗合也且如定歲之法積四基  
餘日而分日加於四基故二至之時祇存絲忽此  
所宜定也又如定日之法日有百刻而變爲九百  
四十畫以氣朔有不盡之數難分故也凡月三十  
日而二氣盈四百十一畫二十五秒一朔虛四百  
四十一畫積盈虛之數以成閏故定朔必視四百  
四十一畫前後爲朧朧祇在一畫之間此又所宜  
定也日月交食唯日食實難定月食分數惟以距  
交遠近別無四時增損蓋月小閏虛大月入閏虛

而實故八方所見同也日爲月所掩而食蓋日大  
而月小日上而月下日遠而月近日異四時月有  
九道故旁觀者遠近自不同矣如北方食旣南才  
半虧南方食旣北才半虧故食之時刻分秒據地  
定表因時求合而後準也如乾清宮火之歲仲秋  
日食日官所步合八分六十七秒而閩廣之區遂  
至食旣其時刻分秒焉可同之今按交食以更歷  
元時分刻刻分分分秒至精至細及至於半秒  
難分之所此又所宜定也夫差之半秒積以歲月  
則躔離朧朧皆不合原算矣是年十月明年九月

十月望月二食時刻分秒並不協嘉靖二年正月  
五星聚營室欽天監掌監事光祿少卿樂護上疏  
曰臣等預算今年正月五星以次聚營室但太陽  
臨近當隱伏不見今候其象果然夫數不爽而象  
暗聚則其降精流氣亦必成祥自古五星之聚莫  
不有大禍惟視人君德政淑慝何如耳占書曰五  
星之聚是謂改易王者有德受慶子孫蕃昌無德  
受殃失其國家百姓流亡蓋天道無親福無常主  
故五星之聚有福有禍無德靡不受禍聚房周祚  
以昌聚箕齊桓用霸漢興聚井宋盛聚奎是四者

皆當更革之際一福一禍培栽覆傾昭然在德惟  
天寶聚于尾箕而唐德弗稱旋有祿山之亂唐業  
遂衰 皇上聖德中興五星適聚可不益修聖德  
愛養黎元以承此大慶乎簡易寡慾修德之大儉  
用省財愛民之實伏乞 陛下鑒此天數之大克  
已約躬勵精而實行之使人心悅而天意孚真所  
謂有德受慶矣臣職司占候竊惟禍福之祥莫大  
於此至於修德應天之實非臣等之言所能盡意  
更乞延訪文武羣臣博求修德愛民之道而實行  
之以及內外左右莫不修省協贊承此大慶不使



天眷別有所顧則宗社生靈不勝幸甚占書又曰  
天下兵謀則五星聚於營室凡所以內修外攘以  
銷夷狄盜賊之謀者似亦不可不加之意也伏乞  
皇上亟與大臣圖之疏下禮部部言堯舜授受日  
曆數在躬允執厥中四海困窮天祿永終 皇上  
起自潛邸入承大統正德年間權姦用事冗濫靡  
費蠹耗無餘天下之財盡歸權室公私赤立國非  
其國 皇上起而救之生理未復重以水旱非常  
之災流移轉徙餓莩相壘朝廷屢議賑恤而在官  
無可發之廩在民無可貸之儲相顧錯愕計無所

出所謂四海困窮者積漸至此遺大投艱付託甚  
重亨屯拯溺求壘甚切伏壘仰稽乾象俯順時宜  
圖任老成斥遠羣小崇敬畏戒逸欲嚴諸一心自  
足以爲祈天永命之本其他齋醮祈禳異端小說  
不宜輕信以啓佞門傷治體至於足國裕民則今  
日之務莫急於此必先儉約必端好尚必慎差遣  
必重爵賞必戒典作稍在得已即賜停止務求安  
靜休養生息假以數年天與之時人盡其力則生  
理庶可復而國用亦自有餘矣臣等待罪禮官星  
家之說素所未習不敢旁引曲證以瀆天聽至於

惠迪吉從逆凶作善降祥作惡降殃天命靡常常  
於有德永言配命自求多福則歷聖言之若出一  
口傳曰畏聖人之言伏乞垂情經典堯舜爲師執  
一中以臨照百官賚四海以永綏天祿應天之實  
莫大於此其欲修攘以銷盜賊夷狄之謀者候命  
移咨兵部上議仍乞勅令百官同加寅畏勉修職  
業凡事有關國體民生至計者並許直言以共成  
嘉靖之治宗社幸甚生民幸甚時又有華湘亦以  
光祿少卿管欽天監事上言自昔聖王承天御極  
必以治曆明時爲先乾坤奠位之後四時七政隨  
天而運寒暑代謝爲歲虧盈互易爲月晝夜還轉  
爲日經緯錯列爲星辰步算周審爲曆數天子奉  
順陰陽時以作事事以厚生而世治時苟不明晦  
朔弦望失其節分至啓閉乖其期則無以談洽生  
靈而世亂矣夫曆之來由黃帝訖秦末凡六改由  
漢高祖訖漢末凡五改由魏文帝訖隋末凡十三  
改由唐高祖訖周末凡十六改由宋太祖訖宋末  
凡十八改由金熙宗而訖元末凡三改一曆之改  
廣集衆見思無遺智法無遺術宜其永久不變然  
歷代長於曆者不數歲而輒差杜預曰陰陽之運

隨動而差差而不已遂與曆錯歐陽修曰事在天  
下其易差者莫如曆夫所以差者由天周有餘日  
周不足也天周有餘則天常平運而舒日周不足  
則日常內轉而縮天日之差於中星驗焉堯之冬  
至初昏卯中而日在虛七度虛者北方之宿則日  
行北陸纏於玄枵之子也今之冬至初昏室中而  
在箕三度箕者東方之宿則日行東陸纏於析木  
之寅也計今去堯未四千年而差五十度矣再以  
赤道考之勝國至元辛巳改曆天正冬至赤道歲  
差一度五十秒今退天三度五十二分五十秒也

黃道歲差九十二分九十八秒今退天三度二十  
五分七十四秒也故洪武中漏刻博士元統上言  
我朝承運以來曆雖以大統爲名而積分猶授時  
之數年遠數盈漸差天度距元辛巳至元統上言  
時歲在洪武甲子僅一百四十年迄今則二百四  
十二年授時曆法每歲差一分五十秒約七十年  
差一度今合差二度餘矣年逾遠而數逾盈然則  
治曆者豈不可隨時修改以求合於天哉夫不隨  
時修改求合於天則曆必差是以正德戊寅日食  
庚辰月食時刻分秒起復方位多與欽天監推算

不合山東道御史朱節謬薦臣知曆學改官於茲  
恭惟 皇上入繼大統之年適與元之革命改憲  
辛巳之歲相符則調元正曆以來未立之差法固  
有待於今日臣切念班固作漢志以明治曆不可  
不擇者三專門之裔明經之儒精筭之士臣於三  
者無一焉蚤夜憂遑罔知所措然於治曆之法聞  
其槩矣古今善治曆者三家一日漢大初曆以鍾  
律起二日唐大衍曆以著策起三日元授時曆以  
晷影測就日體測之毫忽微眇不可得而逝者元  
史所謂自古及今推驗之精蓋未有出於此顧豈

誣哉今欲正曆而不登臺測影臣竊以爲皆空言  
臆見也伏望令臣暫住朝參督率曾奏改曆中官  
正周濂及於疇人子弟中掄選諳曉本業善於書  
筭者及今冬至之前親詣觀象臺晝夜推測日影  
赤道黃道中星分秒日計月書至來年冬至以驗  
二十四氣二至二分日月交食合朔弦望日躔月  
離黃赤二道及昏旦中星七政躔度紫氣月孛羅  
候計都之類視元辛巳所求委有所差備錄上覽  
乞勅禮部延訪四方有能知曆理如楊雄善立差  
法如邵雍沉潜智巧如許衡郭守敬者令其詳定

歲差以成一代之懿制夫天文七曜三垣二十八宿爲大聖人觀天文以察時變觀此也此其有恒之象也雲雨震電風雪霜露類皆天象而非其恒也彗孛虹珥之類其怪也夫日大明陽之精光君象也月夜明陰之精光也后有失德則適見于天而薄食日食陽不勝陰也月食陰不讓陽也先王謹天戒莫嚴于日食矣春秋二百四十二年而日食三十六日官失之也史官失之也日輪大月較小日道近天在上月道近人在下故日食既時四面有光溢出也水火金木土即人間日用五府之精光也水行最速一瀉千里金行於世其流如泉火三月而改木一歲而彫土博厚不遷故金水附日歲一周天火二歲木十二歲土二十八歲一周天土亦名填讀如鎮以填靜爲體讀如田以填塞爲用也木星八十三年而與日合者七十六火七十九年而與日合者三十七

土五十九年而與日合者五十七金水雖隨日然金八年而合於日者五水四十六年而合於日者一百四十五三垣曰天市明堂位也曰太微朝廷位也曰紫微宮寢位也明堂

位者天子巡狩之居也朝廷位者聽政之居也宮  
寢位者燕息之居也天市歲臨之太微日臨之紫  
微朝夕在焉七曜必遵黃道歷天街歲一受事太  
微而出猶大臣受天子之命於朝以行其職也二  
十八宿分列四方各守其野率諸經星以共紫微  
之帝猶郡國百司各治其職安其民人以承天子  
也二十八宿者蒼龍白虎朱雀玄武各七宿也角  
主發育萬物亢日䟽廟氏爲天根房天子之後寢  
鍵閉鈎鈐兩咸以防淫而謹內也心天子象言天  
地之心人之主也尾主后妃敘御子主所箕承帚  
掃又揚穀之器尾而受之以箕示婦道也五星聚  
箕尾而有天寶之亂亂自色荒也斗主薦賢受祿  
斗爲噐量所以斟酌也民事莫重於耕織故牛女  
相聯牛農丈人耕具驪珠女獻工也天田九星象  
井田狗天鷄教樹畜也羅堰九坎天淵言農桑者  
先水利也北陰也故虛與危主死喪危禍事室以  
農畢而見故主管建宮室事嘉靖甲申五星聚營  
室矣壁圖書之秘府奎天子武庫婁主蕃牧犧牲  
以供祀事自室以至於婁天子之宮館苑囿在焉  
胃儲藏五穀之府昴主刑獄又名旄頭占胡人順

逆畢主邊兵昴畢之間有天街分華夷也參中三星中軍其中大將旁參謀也二肩左右將軍二足前後將軍紫脣行軍之藏府井主水泉主水衡法令平中之事物之平者莫如水故營國制城畫堦分州皆取象焉鬼主內外祠祀事柳主草木又爲天厨主饗燕事星爲文明之會主衣裳文綉張主珍寶宗廟服用翼天子之樂府也軫主車騎任載又星搖星隕大異也凌犯守留芒角掩各以類占之若乃日之行道周天如循環月亦然兩環兩交一謂之天首一謂之大尾天尾爲計天首爲羅月行遲速有常度最遲之處即孛也故謂之月孛孛六十二年而七周天炁生於閏二十八年十閏而炁行一周天炁孛皆有其度數無光象故與羅計同謂之四餘并七政爲十一也

洪武元年三月辛卯彗星出昴北二年五月甲午朔四年九月庚戌朔七年二月丁酉朔八年七月巳未朔日食九年六月戊子客星見七月癸丑朔日食乙亥客星没十年二月白虹貫日十二月乙巳朔日食白虹貫日十一年九月客星掃天并十二月乙巳朔十四年十月壬子朔日食十一月黑

氣亘天十五年正月白虹貫日二月彗星見十六年正月白虹貫日八月壬申朔日食十八年二月乙巳初昏五星並見九月戊寅太白經天客星入太微垣乙酉彗長丈掃翼十月彗星掃天廟十九年三月白虹貫日四月熒惑留南斗七月癸亥三辰晝見十二月癸未朔日食二十年二月五星皆見五月丁丑三辰晝見六月太白經天秋二十一年五月甲戌朔二十二年九月丙寅朔日食十二月白虹貫日二十三年正月熒惑入南斗九月庚寅朔二十四年二月戊子朔日食四月彗星三入

紫微垣二十六年四月太白經天七月甲辰朔日食二十九年五星數失度三十年二月白虹亘天貫日五月壬子朔日食十月熒惑犯南斗

建文二年三月丙寅朔日食

永樂元年四月太白出昴北四年六月己未朔五年十月辛巳朔六年四月己卯朔十月乙亥朔十一年正月辛巳朔十二年正月丙子朔六月丙寅朔十一月甲午朔十四年五月壬辰朔十五年四月丁巳朔十月癸未朔十八年八月丁酉朔十九年八月辛卯朔二十年正月己未朔二十一年六月



月庚戌朔日食

洪熙元年四月有星變十月丙寅朔日食

宣德五年八月己巳朔日食十月夜有蓬星八日始滅十二月有異星見或曰含譽星也六年四月彗出東井九月熒惑犯南斗七年正月辛酉朔日食八年八月熒惑犯南斗閏八月彗出天倉旁入貫索掃七公是月有怪星見或曰歸邪星也

正統元年九月白虹貫日修狼星動搖四年八月丙子朔五年正月甲辰朔六年正月己亥朔七月丙申朔七年六月庚寅朔八年六月甲申朔十一

月壬子朔九年十月丙午朔十年四月

朔十

一年四月

朔十二年八月

朔日食十三

年二月

朔日食

景泰元年正月壬午彗星出天市垣掃天紀二年六月朔日食三年三月甲午有星孛於畢八月熒惑晝見十一月己未朔日食癸未客星見輿鬼四年五月乙丑有星出鈎陳址二小星隨之丁丑歲星晝見六月甲辰歲星晝見五年四月

朔六年四月

朔日食

天順二年二月

朔七年五月

朔日食成

化二年太白曳入南斗三年二月丁酉朔日食既  
四年二月壬辰朔日食七月有星孛於台斗五年  
六月癸丑朔六年六月戊申朔日食七年春有星  
孛于天田八年春彗星見軒轅九年三月山東諸  
路黑氣亘天晝晦四月辛酉朔十年九月癸丑朔  
十二年二月乙亥朔日食十三年正月山陰雨血  
射人六月甲辰京師雨錢十八年五月己巳朔日  
食二十年元日星變九月乙酉朔日食二十三年  
五月星隕

弘治元年六月癸巳朔二年十二月甲申朔日食

三年十二月辛亥彗星見于天津七年二月己卯

朔日食五月宣府山西河南白晝隕星八年三月

乙酉朔十三年五月甲寅朔日食是年彗星見十

五年五月庚午朔九月庚午朔日食十一月戊子

雲南晝夜黑九日十八年九月庚子恒星書見

正德元年三月隕星大如月六月辛酉震郊壇門

七月己丑彗星見于參井入北斗至於戊戌乃滅

太白經天白虹貫日八月大角大火中星動搖天

璇天機天權星晦二年正月乙亥朔九年八月辛

卯朔十年十二月癸丑朔十二年六月己巳朔十

三年五月己亥朔十五年三月癸丑朔日食十六  
年正月有星孛于東南頃之橫絕東西復爲鈎屈  
二月長安大雷電以風雨白毛三月癸丑朔日食  
嘉靖三年正月五星聚于營室四年十二月乙卯  
朔日食五年五月丁丑朔六年五月丁丑朔日食  
六月甲子京師雨錢七月壬辰南京雨血七年五  
月辛未朔八年十月癸亥朔日食十年六月乙巳  
彗星見東井十一年春彗星再見八月彗星見東  
星十二年六月彗星見昴畢射天漢十月辛巳星  
隕如雨十八年四月庚申彗星見兩旬始滅六月  
丁酉震奉先殿閏七月庚申木火水金星聚東井  
十九年三月癸巳朔日食九月壬子熒惑入南斗  
十月水土金星聚于角十二月戊午太白經天二  
十一年七月己酉朔日食八月丁酉熒惑掩南斗  
杓二十二年正月丙午朔日食二十三年六月熒  
惑犯南斗二十四年五月壬戌朔日食二十六年  
木星逆行留營室二十七年三月朔日食望月食  
二十八年三月辛未朔日食

皇明天文述終

子履準校正

皇明地理述序

余聞之學士大夫言我朝疆域過於宋敵於唐  
不及於漢蓋以失朔方大寧交趾及開平興和玄  
菟樂浪燉煌故也夫堯封禹貢閩越無聞荆蠻徐  
戎殷周爲梗以今視昔奄甸弘矣述輿地  
嘉靖丙寅五月朔鄭曉識

皇明地理述上卷

吾學編第六十一

海鹽鄭曉

洪武三年冬儒士魏俊民黃箎劉儼丁鳳鄭思先  
鄭權上 大明志命秘書監梓行授俊民等官先  
是 上令俊民等類編天下州郡地理形勢降附  
始末爲書凡行省十二府一百二十州一百八縣  
八百八十七安撫司三長官司一東至海南至瓊  
崖西至臨洮北至北平六年令州府繪上山川險  
易圖十六年詔天下都司上衛所城池地理山川  
關津亭堠水陸道路倉庫圖十七年令朝覲官上

土地人民圖十八年夏 上覽輿地圖侍臣有言  
輿地之廣古所未有者 上曰地廣則教化難周  
人衆則撫摩難徧此正當戒慎天命人心惟德是  
視紂以天下而亡湯以七十里而興所係在德豈  
在地之大小二十七年寰宇通衢書成書分爲八  
目東距遼東都司又自遼東北至三萬衛西極四  
川松番衛又西南距雲南金齒南踰廣東至崖州  
又東南至福建漳州府北暨北平大寧衛又西北  
至陝西甘肅爲驛九百四十浙江福建江西廣東  
之道各一河南陝西山東山西北平湖廣廣西雲

南之道各二四川之道三爲驛七百六十六凡天  
下道理縱一萬九百里橫一萬一千七百五十里  
四夷之驛不與焉永樂六年張輔沐晟上交趾圖  
東西一千七百六十里南北二千八百里十六年  
詔纂天下郡縣志命原吉榮叅攷領其事景泰中  
修寰宇通志准祝穆方輿勝覽葉盛曰此趙宋偏  
安之物况直爲四六設今欲成盛代一統之書宜  
有資軍國益勸戒如地理戶口類不可缺必如永  
樂中志書凡例克廣之可也陳循不聽笑曰此豈  
造黃冊耶天順五年撰 大明一統志嘉靖三年

文選郎中夏良勝撰統官志直述郡縣煩簡爲銓授簿例爾八年少保桂萼上吏部員外郎李默所撰皇明輿地圖叙記條其風俗阨塞兵賦藩封稍稱精覈十六年禮部主事許論上九邊圖論條析鎮塞利害亦爲明練

### 京畿

京師負重山面平陸地饒魚鹽穀馬果窳之利又轉漕東南財貨駢集天險地利足制諸胡汴洛關中江左皆不及也真定北至於永平昔爲內郡乃今居庸紫荆山海喜峰古北黃花鎮皆稱阨塞故

漁陽保塞重兵屯焉廣平順德大名山東西晉齊南北舟車並集臨清天津海運故道遮洋餉舟下直沽至漁陽猶海運也河間直保多降胡性獷難馴東安霸州武清而東野曠人稀凶徒伏匿迤山有樵牧之利姦人淵藪其中有司莫敢踪跡若乃水利不修旱澇歲困田野不闢租徭日增馬牧不蠲坐糜財力貴游不戢兼併膏腴郵傳不節水陸繹騷關譏不嚴奸胡吮伺皆不可謂非急務也

京畿府八州十九縣一百十六 戶四十一萬八千 口三百四十一萬三千 賦六十萬一千

順天府 五州二十二縣

大興宛平良鄉固安永清

東安香河通州 縣四

三河武清寶坻灤昌平州 縣

三順義密雲懷柔涿州 縣一

房山霸州 縣三 文安

大城保定薊州 縣四

玉田豐潤遵化平谷

保定府 三州十七縣

清苑滿城安肅定興新城唐

博野慶都容城完蠡雄 縣二

祁州 縣二 深澤東鹿安州

縣二 高陽新安易州 縣一 涑水

河間府 二州一十六縣

河間獻阜城肅寧任丘交

河青興濟靜海寧津景州 縣三

吳橋東光故城滄

州 縣三 南皮鹽山慶雲

真定府 五州二十七縣 直定井陘獲鹿元氏靈壽

藁城無極平山阜平定州 縣三 新樂曲陽行唐冀

州 縣四 南宮新河棗強武邑晉州 縣三 安平饒陽

武強趙州 縣六 柏鄉隆平高邑臨城贊皇寧晉深

州 縣一 衡水

順德府 九縣 邢臺沙河南和平鄉廣宗鉅鹿唐山

內丘任

廣平府 九縣 永年曲周肥鄉鷄澤廣平邯鄲成安

威清河

大名府 一州十縣 元城大名南樂魏清豐內黃濬



滑東明開州縣一長垣

永平府一州五縣盧龍遷安撫寧昌黎灤州縣一

樂亭

隆慶州縣一永寧保安州

南京畿

南京畿開基之地也勝勢在長江太祖自上流和陽橫江渡克采石下太平三戰而入集慶成祖出維揚儀真遡洄而上龍潭浦口望風奔潰比至金川啓關納款以故留都守禦卅師爲急藩垣之固專倚江北徐賴跨中原瓜連數省淮安控徐

揚魯齊文武重臣開府作鎮雖職兼漕撫而聯絡兩京廬民多游手野有遺利鳳陽高墻陵墓供億繕葺財力冗費豐沛之間濁河泛濫幾淪魚鱉轉餉既艱民亦凋瘵决嚙之患濠泗尤棘揚有嵯臺富商走集民頗豐洽俗亦浮靡瀕湖農田塗墊爲患江南安慶當長江委流東約全楚爲江表門戶蘇松常三郡市浮於農文勝於質加之田賦不均稅徭日困常征之外坐派日煩沿海兵戍本以備倭而太倉崇熟瀕海之民擅鹽魚之利間作弗靖出沒江洋肆行剽劫以故江防海備並爲要職

多山少田民逐末利風俗用偷池在山麓江滸多  
流冗寇盜因以竄匿鎮江鑿山通漕海潮下上穀  
土歲易利歸豪貴財盡貧冗矣

南京畿府十四州十七縣九十六 戶一百九十  
六萬二千 口九百九十六萬七千 賦五百九  
十九萬五千

應天府八縣 上元江寧句容溧陽溧水江浦六合  
高淳

鳳陽府五州十三縣 鳳陽臨淮懷遠定遠五河虹  
壽州縣二 霍丘蒙城泗州縣二 盱眙天長宿州縣

靈璧潁州縣二 潁上太和亳州

蘇州府一州七縣 吳長洲崑山常熟吳江嘉定太

倉州縣一 崇明

松江府三縣 華亭上海青浦

常州府五縣 武進無錫江陰宜興靖江

鎮江府三縣 丹徒丹陽金壇

揚州府三州七縣 江都儀真太興高郵州二縣 興

化寶應泰州縣一 如臯通州縣一 海門

淮安府二州九縣 山陽鹽城清河安東桃源沐陽

海州縣一 贛榆邳州縣二 宿遷睢寧

廬州府 二州六縣 合肥廬江舒城無爲州 縣一巢

六安州 縣二 英山霍山

安慶府 六縣 懷寧桐城潛山太湖宿松望江

太平府 三縣 當塗蕪湖繁昌

寧國府 六縣 宣城寧國涇太平旌德南陵

池州府 六縣 貴池青陽銅陵石埭建德東流

徽州府 六縣 歙休寧婺源祁門黟績溪

廣德州 縣一 建平和州 縣一 含山滁州 縣二 全椒

來安徐州 縣四 蕭碭山豐沛

湖廣

湖廣跨有江漢武昌其都會也南漚湖溪北擁原

陸山高水濶効其靈秀承天王氣獨萃焉鄖襄上

走秦梁德黃下臨吳越荆顧巴蜀辰扞雲貴柳桂

通五嶺入八閩衡據南岳之勝永寶之間謹備苗

夷而已常德地廣民貧漢陽土狹利薄岳州當洞

庭之波仰資市利長沙雖卑濕民物稱盛顧穀

土泥塗甚於禹貢宗藩賦祿廣於周封傳符紛紜

流冗雜沓土酋橫強猶復征調洞蠻草竊徒示羈

縻皆足爲慮乃若民寡蓄儲官多徵集坐費財力

益肆訾窳非明示休息恐未得安靖也

湖廣布政司領府十五州十六縣一百五 戶五  
十三萬一千 口四百三十三萬三千 賦二百  
一十六萬七千

武昌府 一州九縣 江夏武昌嘉魚蒲圻咸寧崇陽

通城興國州 縣二 大冶通山

承天府 二州五縣 鍾祥京山潛江荊門州 縣一 當

陽

沔陽州 縣一 景陵靖州 縣三 會同通道綏寧郴州

縣五 永興宜章興寧桂陽桂東

漢陽府 二縣 漢陽漢川

襄陽府 一州六縣 襄陽宜城南漳棗陽穀城光化

均州

鄖陽府 七縣 鄖房竹山上津竹溪鄖西保康

德安府 一州五縣 安陸雲夢應城孝感隨州 縣一

應山

黃州府 一州七縣 黃岡蘄水羅田麻城黃陂蘄州

縣二 廣濟黃梅

荊州府 二州十二縣 江陵公安石首監利潛江松

滋枝江夷陵州 縣三 長陽宜都遠安歸州 縣二 興

山巴東

岳州府 一州七縣 巴陵臨湘華容平江澧州 縣三  
石門慈利安鄉

長沙府 一州十一縣 長沙善化湘潭湘陰寧鄉瀏

陽醴陵益陽湘鄉攸安化茶陵州

寶慶府 一州四縣 邵陽城步新化武岡州 縣一新

寧

衡州府 一州八縣 衡陽衡山來陽常寧安仁酃桂

陽州 縣二 臨武藍山

常德府 四縣 武陵桃源龍陽沅江

辰州府 一州六縣 沅陵辰溪盧溪溆浦沅州 縣二

黔陽麻陽

永州府 一州六縣 零陵祁陽東安道州 縣三 寧遠

永明江華

浙江

浙江山海江湖所在限隔大海東蟠直轉淮陽重  
湖右滙波聯圻輔左逾信郡即走江西南入閩關  
遂連甌越而杭州其都會也杭山水秀麗人慧俗  
奢衣被可觀米薪是急嘉湖寔與江東相表裏兩  
稅困人貧者流徙富者并兼海鹽之塘利害通於  
蘇松歲築歲傾勞費已甚安吉以西山越巢窟錯

入廣德好訟喜鬪累興大獄至勤誅討笠澤之間  
鹽徒出沒剽掠村墟久之不治將有隱憂嚴衢金  
華以徽饒為郭郭生理為優征徭亦簡寧紹温台  
並海而南達於汀漳估客來往人獲其利寇至倉  
卒亦能為禍倭夷貪市中國矯云奉貢風帆所指  
突至寧波華人交通倏去忽來詐諛叵測除戎之  
戒定海為棘處人視他郡為悍依山盜礦糾結四  
集激之易亂緩之難馴

浙江布政司領府十一州一縣七十五 戶一百  
二十四萬二千 口四百五十二萬五千 賦二

百五十一萬

杭州府 九縣

錢塘仁和海寧富陽餘杭臨安於潛

新城昌化

嘉興府 七縣

嘉興秀水嘉善海鹽崇德平湖桐鄉

湖州府 一州六縣

烏程歸安長興德清武康安吉

州縣一 孝豐

嚴州府 六縣

建德淳安桐廬遂安壽昌分水

金華府 八縣

金華蘭谿東陽義烏永康武義浦江

湯溪

衢州府 五縣

西安龍游常山江山開化

處州府 十縣 麗水青田縉雲松陽遂昌龍泉慶元  
雲和宣平景寧

紹興府 八縣 山陰會稽諸暨餘姚上虞嵊新昌蕭  
山

寧波府 五縣 鄞慈谿奉化定海象山

台州府 六縣 臨海黃巖天台仙居寧海太平

温州府 五縣 永嘉樂清平陽瑞安大順

江西

江西三面距山背沿江漢實爲吳楚閩越之交外  
析險阻中包壤地安危輕重常視他藩卽四方有

事雖欲保境距兵勢難獨完南昌沂江滙湖右荆  
左浙帆檣所集江西一都會也九江獨據上流人  
有市利南康臨彭蠡縮隘土瘠時有寇盜饒州稱  
爲裕阜廣信傳道下邑殷盛撫州人悍多山寇而  
衣食自足頗憂蕪并建昌僻在東南卽有藩封亦  
稱安輯南安贛州則汀漳雄韶山嶼會焉林深谷  
邃寇賊淵藪撫臣提兵牽制數省軍門之費不煩  
度支苟得其人南服一壯鎮也袁州地逼長沙通  
民客戶喜獄好爭譏察旣難綏馴不易臨江瑞州  
素稱樂土吉安山雄水秀人才輩出地利亦饒甲

於諸郡大抵江西之民質儉勤苦時有憂思至爭  
曲直持官府即費財不吝其土窄逐末不務稼穡  
至有棄妻子經營四方老死不歸者

江西布政司領府十三州一縣七十三 戶一百  
五十八萬三千 口七百九十二萬五千 賦二  
百五十二萬八千

南昌府 一州七縣 南昌新建豐城進賢奉新靖安  
武寧寧州

饒州府 七縣 鄱陽餘干樂平浮梁德興安仁萬年  
廣信府 六縣 上饒玉山弋陽貴溪鉛山永豐

南康府 三縣 星子都昌建昌

九江府 五縣 德化德安瑞昌湖口彭澤

建昌府 四縣 南城新城南豐廣昌

撫州府 六縣 臨川崇仁金谿宜黃樂安東鄉

臨江府 四縣 清江新淦峽江新喻

吉安府 九縣 廬陵泰和吉水永豐安福龍泉萬安

永新永寧

瑞州府 三縣 高安上高新昌

袁州府 四縣 宜分分宜萍鄉萬載

贛州府 十縣 贛寧都信豐興國會昌安遠寧都瑞



金龍南石城

南安府 四縣 大庾南康上猶崇義

福建

福建海抱東南山聯西北重關內阻群溪交流雖封壤約束而山川秀美福州其都會也福州及建寧以江浙為藩人稠土沃礦徒作孽波及建寧古田福寧利在魚鹽害亦隨之汀漳山廣人稀外寇內通與南贛聲勢聯絡海物上市時起兵端人悍嗜利喜爭大抵漳州為多興泉文物之盛甲於八閩地利亦豐人懷異順延平邵武事簡人淳雖沙

尤之間或有小竊亦不能為大患

福建布政司領府八州一縣五十三 戶五十萬

九千 口二百八萬二千 賦八十八萬三千

福州府 一州十二縣 閩侯官懷安古田閩清長樂

連江羅源永福福清福寧州 縣二 福安寧德

泉州府 七縣 晉江南安惠安德化安溪同安永春

建寧府 八縣 建安甌寧建陽崇安浦城政和松溪

壽寧

延平府 六縣 南平將樂沙尤溪順昌永安

汀州府 八縣 長汀寧化上杭武平清流連城歸化

皇明地理述  
卷之九  
永定

興化府 二縣 莆田仙遊

邵武府 四縣 邵武光澤太寧建寧

漳州府 八縣 龍溪漳浦龍巖南靖長太漳平和

詔安

皇明地理述上卷終

子復準校正

皇明地理述下卷

吾國編第六十二

海鹽鄭曉

河南

河南當天下之中開封其都會也北下衛漳達京  
圻東沿汴泗轉江淮車馬之達交於四方雖險塞  
不及關中而水陸道里為便彰德控趙魏懷慶走  
晉冀衛輝淇汲亦當傳孔河南嵩洛河華分陝要  
區蔽山南扼河北稱形勝焉汝寧南陽下蘄黃入  
襄鄖又與淮江相為表裏顧分封日盛宗祿日繁  
民亦勞止睢陳歸德大牙畿省轄管不能專奸人

時竊發急之則潰逸四出彰德兵民雜集頗為牽制河洛之間馮險鑄獵習於劔弩難馴易動若山川環互民物殷茂汝寧為優

河南布政司領府八州十二縣九十七戶五十八萬九千口五百一十萬六千賦二百四十一萬四千

開封府四州三十縣祥符陳留杞通許太康尉

氏洧川鄆陵扶溝中牟陽武原武封丘延津蘭陽

儀封陳州縣四商水西華項城沈丘許州縣四臨

潁襄城郟城長葛鈞州縣二新鄭密鄭州縣四滎

陽滎澤河陰汜水

歸德府一州八縣商丘寧陵鹿邑夏邑永城虞城

睢州縣二考城柘城

彰德府一州六縣安陽湯陰臨漳林磁州縣二武

安涉

衛輝府六縣汲胙城新鄉獲嘉淇輝

懷慶府六縣河內濟源修武武涉孟温

河南府一州十三縣洛陽偃師鞏孟津宜陽登封

永寧新安沔池嵩陝州縣三靈寶閿鄉盧氏

南陽府三州十五縣南陽鎮平唐泌陽桐柏南召

鄧州縣三內鄉新野浙川裕州縣二舞陽葉汝州  
縣四魯山郊寶豐伊陽

汝寧府二州十二縣汝陽真陽上蔡新蔡西平遂

平信陽州縣二羅山確山光州縣四光山固始息  
商城

陝西

陝西山河四塞神臯隩區也平涼固原豐草平野  
監牧蕃滋鞏鳳之墟亦稱雄劇延慶沙葦蕭條而  
人士精勁寧夏隔在河外別為一區水穀之利亦  
足自養甘涼以西至於嘉峪左右番達勢為孤危  
洮岷西寧錯入羌族要在撫輯而已西安會府生

理殷繁塞餉藩祿十居七八閭閻疾苦殆與他郡  
相當漢中西川襟喉潼關保障全陝並為重地若  
乃茶之禁漸弛藩牧之地漸廣僕苑之畜漸耗異  
類之巢漸深斥堠之封漸蹙調弦改轍皆在所急  
河套之議至殘督府為世大戒矣

陝西布政司領府八州二十縣九十五戶三十  
六萬二千口三百九十三萬四千賦一百九  
十二萬九千

西安府六州三十縣長安咸寧咸陽盩厔興平臨

潼高陵鄠藍田涇陽三原商州縣四鎮安洛南山

陽商南同州縣五朝邑郃陽澄城白水韓城華州

縣三華陰渭南蒲城耀州縣二同官富平乾州縣

三醴泉武功永壽邠州縣二淳化三水

鳳翔府一州七縣鳳翔岐山寶雞扶風郿麟遊隴

州縣一汧陽

漢中府二州十四縣南鄭褒城城固洋西鄉鳳沔

寧羗州縣略陽金州縣六石泉洵陽平利漢陰白河紫陽

平涼府三州七縣平涼崇信華亭鎮原涇州縣一

靈臺靜寧州縣二莊浪隆德固原州

鞏昌府三州十四縣隴西安定會寧通渭漳寧遠

伏羗西河成秦州縣三秦安清水禮階州縣一文

徽州縣一兩當

臨洮府二州三縣狄道渭源蘭州縣一金河州

慶陽府一州四縣安化合水環寧州縣一真寧

延安府三州十六縣膚施安塞甘泉安定保安宜

川延川延長鄜州縣三洛川中部宜君綏德州縣

二清澗米脂葭州縣三吳堡神木府谷

### 山東

山東在兩都之間外引江淮內馮遼海西走趙魏  
北屆滄瀛而川陸孔道並會德州自海運既廢此

皇明地理文 卷之四  
為漕渠築塞疏濬舟車牽挽勞役無休時兗州水  
潦為虐疾苦滋甚青多礦賊禁輯尤難公私交病  
成山沙門上下礁磧險毒勢難輒議聞諸往蹟平  
度東南有南北新河南起淮北安東北出海倉入  
北海不數日抵直沽勝國濬治置閘通舟避開洋  
之險嘉靖中副使王獻修濬有緒讒言中阻臨清  
濟寧有喉吭之憂此亦未為不知務也登萊僻在  
膠東三面距海利在魚鹽蠶積農田亦足自贍且  
無海寇牧撫得人不失為樂土也  
山東布政司領府六州十五縣八十五 戶七十

七萬 口六百七十五萬九千 賦二百八十五  
萬一千

濟南府 四州二十六縣 歷城章丘鄒平淄川長山  
新城齊河齊東濟陽禹城臨邑長清肥城青城陵  
太安州 縣二 新太萊蕪德州 縣二 德平平原武定  
州 縣四 陽信海豐樂陵商河濱州 縣三 利津霑化  
蒲臺

兗州府 四州二十三縣 滋陽曲阜寧陽鄒泗水滕

嶧金鄉魚臺單城武曹州 縣二 曹定陶濟寧州 縣

三 嘉祥鉅野鄆城東平州 縣五 汶上東阿平陰陽

皇明地理文 卷之四 五

穀壽張沂州縣二剡城費

東昌府三州十五縣 聊城堂邑博平茌平清平莘

冠臨清州縣二丘館陶高唐州縣三恩夏津武城

濮州縣三范觀城朝城

青州府一州十三縣 益都臨淄博興高苑樂安壽

光昌樂臨朐安丘諸城蒙陰莒州縣二沂水日照

登州府一州七縣 蓬萊黃福山棲霞招遠萊陽寧

海州縣一文登

萊州府二州五縣 掖平度州縣二濰昌邑膠州縣

二高密即墨

山西

山西表裏河山人稠地狹俗尚勤儉果毅任氣北

倚重邊極稱險塞自大同及側虜數入內郡鴈門

南北為虜通衢今日所備不止河曲而巴山後曠

徒河中屯卒上黨通民亦非細故也嗟乎山西四

郡大同不足恃則太原危矣虜已獲利於潞安其

志時時在平陽每議禦虜輒云居庸紫荆井陘置

鴈門且不論况大同乎夫晉冀勞瘁即無虜患外

轉塞儲內供藩祿猶不能支仰給鹽利當是時而

不早為之所內憂方殷爾

山西布政司領府四州二十縣七十五 戶五十  
八萬九千 口五百八萬四千 賦二百二十七  
萬四千

太原府六州二十二縣 陽曲太原榆次太谷祁徐

溝清源交城文水壽陽臨孟靜樂河曲平定州縣

一樂平忻州縣一 定襄代州縣三 繁峙五臺崞

嵐州縣二 嵐興石州縣一 寧鄉保德州

平陽府六州二十九縣 臨汾襄陵洪洞浮山趙城

太平岳陽曲沃翼城汾西蒲蒲州縣五 臨晉榮河

荷氏萬泉河津解州縣五 安邑夏聞喜平陸芮城

絳州縣二 稷山絳垣曲霍州縣一 靈石吉州縣一

鄉寧隰州縣三 太寧石樓永和

大同府四州七縣 大同懷仁應州縣一 山陰朔州

縣一 馬邑蔚州縣三 廣靈廣昌靈丘渾源州

潞安府八縣 長治長子屯留襄垣潞城壺關平順

黎城

汾州三縣 孝義平遙介休 遼州二縣 榆社和順

沁州二縣 沁源武鄉 澤州四縣 高平陽城陵

川沁水

四川



四川長川沃野穀粟山林竹木蔬果織染之饒自足周贍西屆蕃部南阻蠻落雲棧之北出褒斜瞿峽之流東下荆楚坤維井絡斗絕諸夏實爲陸海而成都其會府也山川綢繆防守爲易盜奸割據安輯爲難以故松壘威茂安綿叙瀘重夔皆有兵憲蓋唇齒之勢利在東南指臂之形險在西北或謂吐蕃寇自黎文南詔賊由沉黎蕃詔糾合必由灌口蒐兵繕障玩弛久矣劇盜起於重夔諸戎伺於臆臘烏撒悍於隣夷龍州梗於餉道皆非細故也建昌西徼奧壤民夷頗輯都江水役郫灌爲

勞亦蒙其利諸郡塘堰官課其成而已

四川布政司領府八州二十縣一百四軍民府三

戶一百十六萬四千 口二百一十萬四千

賦一百二十萬六千

成都府 五州二十七縣 成都華陽雙流温江新繁

金堂仁壽新都井研郫簡資灌彭安內江崇寧石

泉資陽崇慶州 縣一 新津漢州 縣三 什祈綿竹德

陽綿州 縣二 彰明羅江茂州 縣一 汶川威州 縣一

保

保寧府 一州九縣 閬中蒼溪南部廣元巴昭化通

江劔州 縣二 梓潼江油

順慶府 二州八縣 南文西文蓬州 縣二 營山儀隴

廣安州 縣四 渠大竹岳池隣水

叙州府 九縣 宜賓慶符富順南溪長寧高筠連珙戎

重慶府 三州十七縣 巴江津長壽大足永川榮昌

綦江南川黔江合州 縣四 銅梁定遠安居璧山忠

州 縣二 豐都墊江涪州 縣二 武隆彭水

夔州府 一州十一縣 巫山大昌雲陽大寧萬

開達州 縣四 新寧始東鄉

馬湖府

鎮雄府

潼川州 縣七 射洪鹽亭中江遂寧蓬溪安岳樂至

眉州 縣三 彭山丹棱青神 嘉定州 縣八 峨眉

洪雅夾江犍為榮 瀘州 縣三 納溪合江江安

邛州 縣三 威遠大邑蒲江 雅州 縣二 名山榮經

東川烏撒烏蒙芒部軍民府

廣東

廣東在嶺海間古稱樂土北負雄韶以臨吳楚東肩潮惠以制甌閩內闢高廉以控交桂外藩雷瓊

皇明地理志 卷之九  
以扼黎夷廣州山海包絡嶺南一都會也戍洋守  
嶂屯哨勞止韶州嶺險谷平交廣咽喉南雄萬山  
三水控帶群蠻而督府兵餉九郡傳郵盡仰其權  
利惠州提封廣袤悍客曠徒勢難收戢潮州沃野  
廣原昔所患者輦戶斗老今則內寇外夷爲害棘  
矣肇慶據上游當嶺西孔道高州海澳獐獮闢地  
除兵耕守並集可也廉州層山曲水海北要區雷  
州炎徼多平田腴壤逋夫蔽命責在人牧瓊州有  
司並海五指腹心反爲黎穴若乃濱海島夷之國  
以十數雖時時出沒志在貿易非盜邊也顧人逐

山海礦冶番舶之利不務農田或尚剽掠行劫海  
上桴鼓之驚彌滿山谷凡以生齒日繁徵求日困  
師旅數興漁獵還至通山之禁久弛餉軍之饋益  
煩也况夷珍珠窟本民用所興而公私交征反爲  
民病

廣東布政司領府十州七縣六十九 戶四十八  
萬三千 口一百九十七萬八千 賦一百一萬  
七千

廣州府 一州十五縣 南海番禺崇化順德東莞從  
化龍門新寧增城香山新會三水清遠連州 縣二

陽山連山

韶州府六縣曲江樂昌仁化乳源翁源英德

南雄府二縣保昌始興

惠州府八縣歸善博羅海豐河源龍川和平長樂  
興寧

潮州府七縣海陽潮陽揭陽程鄉饒平大埔惠來  
肇慶府一州十縣高要四會新興陽春陽江高明

恩平德慶州縣三瀧水封川開建

高州府一州五縣茂名電白信宜化州縣二吳川  
石城

廉州府一州三縣合浦石康欽州縣一靈山

雷州府三縣海康遂溪徐聞

瓊州府三州十縣瓊山澄邁定安文昌會同樂惠

恩 臨高儋州縣一昌化萬州縣一陵水崖州縣一感

廣西

廣西東南接廣東均在嶺南而風壤氣習異於廣  
東山高而秀水清而駛地利物產優贍自足則桂  
林其都會也若府江左江右江號為三江貫絡諸  
郡綿流甚遠苗夷附據肆為寇竊不但古田荔浦

苦其蠶食而已潯州大藤峽跨黔鬱江上蠻巢穴  
焉雖有屯戍未見摧輯柳慶號為盜區行居苦其  
荼毒設兵制將控馭督警之可無大患思恩田寧  
強悍久矣殘破之餘萌孽復作削土分官不為無  
策南寧太平控遏兩江坐躡交趾寔為桂管保障  
梧州開府稍有兵卒地促人貧全仰東道然諸蠻  
咽吭列郡襟東形勢便矣

廣西布政司領府十一州四十六縣五十四軍民  
府一 戶一十八萬六千 口一百五萬四千  
賦四十三萬一千

桂林府 一州九縣 臨桂興安靈川陽朔永福義寧

古田理定全州 縣一 灌陽

柳州府 二州十縣 馬平洛容羅城柳城懷遠融來

賓象州 縣一 武宣賓州 縣二 遷江上林

慶遠府 二州六縣 宜山天河思恩河池忻城南丹

州 縣一 荔波東蘭州

平樂府 一州六縣 平樂恭城富川賀荔浦修仁永

安州

梧州府 一州九縣 蒼梧藤容岑溪懷集鬱林州 縣

四博白北流陸川興業

潯州府 一州三縣 桂平平南貴武靖州

南寧府 一州四縣 宣化武緣隆安橫州 縣一永淳

太平府 十五州四縣 太平思城茗盈安平思同養

利萬承鎮遠全茗結安龍英結倫都結上下凍左

州崇善羅陽陀陵永康縣

田州府 四州一縣 上隆思城歸德果化上林縣

思明府 六州 思明上思上石西下石西憑祥忠州

鎮安府 思恩軍民府 向武州 縣一富勞 江

州 縣一羅白 都康州 思陵州 奉議州 泗

城州 利州 龍州

雲南

雲南疊山崇峻瀉澗縈紆金碧米鹽之產亦稱精

贍而雲南其一都會也臨安大理永昌鶴慶楚雄

並稱沃壤設險守固鞏內捍外則元江臨安路走

南交金齒騰衝彊隣諸甸末寧麗江聯絡於瀾滄

烏蠻蒙撒控彈於曲靖若尋甸上下風土絕異而

兵衛漸疎矣大抵滇南取道貴陽稍有警動坐令

梗絕城郭人民夷居十八緩則蜂屯蟻聚號令不

行急則不突鴟張勒誅未易苟緩撫得人相與休

息本無禍變顧萬里投窻類無固志時聞蠢動咎

有由矣

雲南布政司領府十四州三十八縣十五軍民府  
八 戶一十三萬二千 口一百四十三萬三千  
賦一十四萬

雲南府 四州十縣 昆明富民宜良嵩明州 縣一 楊

林晉寧州 縣二 歸化呈貢安寧州 縣二 羅次祿豐

昆陽州 縣二 泊易門

大理府 四州三縣 太和趙州 縣一 雲南鄧川州 縣

浪穹賓川州雲龍州

臨安府 五州四縣 建水石屏阿迷寧遠寧州通海

河西崑峨蒙自縣

楚雄府 二州五縣 楚雄定遠廣通定遠磻嘉縣南

安鎮南州

澂江府 二州三縣 河陽江川陽宗縣新興路南州

廣南府 州一 富州

廣西府 三州 師宗彌勒維摩

蒙化府

景東府

鎮沅府

永寧府

順寧府

曲靖軍民府

四州二縣

南寧亦佐縣霑益陸凉馬

龍羅雄州

姚安軍民府

一州一縣

姚州縣一大姚

鶴慶軍民府

二州 劍川順州

武定軍民府

二州三縣

和曲州縣二南甸元謀祿

勸州

縣一石舊

尋甸軍民府

麗江軍民府

四州

通安寶山巨津蘭州

元江軍民府

永昌軍民府

孟定府

孟良府

北勝州

威遠州

灣甸州

鎮康州

大候州

騰越州

貴州

貴州本隸川湖雲南建省設官始於永樂十一年  
緣田酋倡亂旅拒朝命誅討既行始置郡縣官雜  
土流而思州思南三十九長官司者地本蠻夷山  
多箐穴水不涵淳土無貨殖貧瘠已甚官戎歲給



全仰他省加以兵荒匱乏弗繼况省城會區咫尺夷土西南諸郡苦於嶺賊思南石阡銅仁界在川湖鎮寧西播夷峒間寇攘四出師旅數興境內諸酋亦皆佳兵好殺非因俗隨時先幾撫定未易爲力也

貴州布政司領府七州五縣六 戶四萬五千

口二十三萬一千 賦四萬七千

思南府 二縣 婺川印江

鎮遠府 二縣 鎮遠施秉

石阡府

黎平府 一縣 永從

都勻軍民府 一州一縣 獨山清平

銅仁府

程番府

思州府

普安州 永寧州 鎮寧州 安順州

遼東

遼東寔有遼東西地東北西皆夷地南阻海惟山海關內通圻甸蓋渤碣之外一都會也西南起山海歷醫無閭長白諸山包絡北東南走海上海薄

蓋金以西接盧龍可渡登萊泛吳浙地饒魚鹽穀  
馬國初馬雲葉旺經略置衛所不復如古設郡縣  
獨遼陽開原有安樂自在二州處降夷其保塞奚  
夷東北則建州毛憐女直諸衛西北則兀良哈朶  
顏福餘太寧三衛分地世官互市通貢恩威羈縻  
爲我藩蔽而奸闖出入亦不能盡禁東北諸夷屋  
居耕食不專射獵警備差緩西北俗仍北虜時時  
抄掠故遼東備邊與諸鎮異要在隨勢安輯先事  
防守俾信義相懷足制其心斯爲上計俘斬論功  
第二義也寧遠東西兩屯頗安給錦義地瘠寡生

理廣寧無屯營之利率仰給轉粟與遼陽隔河河  
亘數百里遼陽舊城在焉草木豐茂更饒魚鮮國  
家委與諸夷彼進據腹心限隔東西守望勞費道  
里迂遠成化以來屢議收復而屢作屢輟竟不可  
行遼陽以此益聚兵兵倉益窘開原三城三面受  
敵六堡雖復二虜輒巢清陽鎮夷間聚而謀我我  
失漁樵之利又略我男女易畜產二江外否卽繫  
之耕織日夜無休時西馬市廢蒲河懿路殘破不  
可言撫順通夷貢市內外皆山多伏虜我難於斥  
望瀋陽雖有關虜馳牧外險內夷不能援鳳凰壁

戟東垂鴉鵲鎖鑰西境並海四州恃得勝之捷無  
海寇私治中嘗一至未及岸而去然遼水南注海  
溢不能洩患苦沮洳矣

### 薊州

國初即古會州大寧地設北平行都司與營諸屯  
衛封建寧藩與遼東宣府聯絡東西爲外邊已而  
魏國公經略自古北口至山海關增修關隘爲內  
邊以故薊州西接居庸北折而東南抵海上盡漁  
陽盧龍皆其管內艤泛登萊陸走趙魏肩肘奚連  
襟帶原澤馮翊京師號稱雄鎮又地壤深厚樹畜

漁鹽黍稷之利甲於圻內 文皇靖難兀良哈內  
附廼徙北平行都司於保定爲大寧都司而散布  
與營諸衛京府之境大寧地盡畀兀良哈通貢互  
市爲我藩籬朶顏大寧福餘三衛是也自是紅螺  
白雲之北棄與戎寇遼東宣府聲援隔絕諸夷裂  
我險阻闖我門庭要我官賞殘我吏民喜峰三屯  
密雲白羊僅僅收縮譬之左臂癱腫則上谷孤子  
後背偃僕則盧龍單薄哽其喉吭則遼海坐隔扼  
其膏腹則陵寢警逼失計甚矣正統以前夷心畏  
服方隅寧謐土木之變三衛爲也先鄉道始命都

御史鄒來學經略已而總兵叅將內臣增設日多  
三衛亦矯詐反覆然尚未敢顯言爲寇也弘治中  
守臣楊友張瓊燒荒掩殺無辜邊釁遂起正德以  
來部落既蕃朵顏獨盛陽順陰逆累肆侵噬花當  
脅求添貢把兒孫深入虜掠動稱結親迤北恫疑  
中國而叅將陳乾魏祥先後陷沒以故三衛日驕  
嘉靖中革蘭台輒要官賞請益貢禍機所伏不待  
智者而知也天壽山七陵在焉余嘗從祠官至長  
陵北望烽堞不數里已已之變祠官不能至昌平  
昌平陵衛吏卒如僑寓增兵繕障於斯爲急古北

口潮河川俱要害而潮河川本殘元避暑故道尤  
爲虜衝作橋則浮沙難立爲塹則漲水易淤都御  
史洪鍾雖嘗設有關城勢孤難守議者欲塞川流  
建石墩數十令其錯綜宛轉下通流水上傳烽火  
亦一策也喜峰口三衛貢道稍深峻燕河營太平  
寨馬蘭峪密雲四營聲勢相援虜卽至中兩營當  
其衝燕河密雲相倚角遵化三屯建昌固其內防  
虜當大挫永平梁城間無虜患亦無海寇若乃山  
麓林莽樊樹阻固以供薪炭伐條枚日就踈薄嘉  
靖中胡守中又出塞盡斬遼金以來松林百萬自

撤藩蔽矣

### 宣府

宣府漢上谷也國初開平王克元上都設衛開平置八驛東四驛曰涼亭泥河賽峰黃厓接大寧古北川西四驛曰桓州威虜明安隰寧接獨石成祖四出塞皆道開平興和萬全間嘗曰滅此殘虜惟守開平興和大寧遼東甘肅寧夏邊陲永無虞矣已乃棄大寧與虜興和亦廢而開平失援宣德中遂徙衛獨石威國蓋三百里正統末獨石八城殘破宣府遂為重鎮宣府山川糾紛地險而狹分

屯建將倍於他鎮勢完易守然去京師近北門鎖鑰慎哉慎哉鎮分五路獨石八城為北路地雖懸遠然阻長安嶺虜難逕下中路葛峪大白陽青邊諸堡西路柴溝洗馬林萬全諸城南路東西順聖川皆稱虜衝東路永寧四海冶龍門朵顏所伺而四海冶上通開平大路下連橫嶺兒亦要地也宣府素稱戰兵自叅將都勳出境燒荒遇虜二十騎而潰關山王經前後陷沒及習聞大同之變此其漸已久撫臣守將交任其責可也况芻粟日窘每有警報輒議乞運弘治中宣府粟草積至六七年

少亦不下三四年今數月且不給幸虜無他計僅  
爲草竊即狡不過也先火篩輩萬一屢入內地知  
我虛實不徒寇掠更迭困我宣府至京僅三百里  
柰何不早爲之所也國初至宣德空運皆董以武  
帥役以營卒景泰以後取諸民力

### 大同

大同川原平行故多虜患虜南犯應朔不西入平  
虜威遠則中經右衛水口諸城堡即掠順聖左右  
天城陽和當其衝矣平虜西連老營堡近偏頭關  
焦家坪娘娘灘羊圈子蕎麥川狗澗灰泉皆套虜

渡口虜涉河瞬息可至故大同稱難守况大邊旣  
失二邊之內棄爲虜庭墩軍騎情警報不明至與  
虜通反爲鄉導夫復五堡增高山聚落之戍爲急  
五堡復則屏外固內而沃土茂田盡爲我利二邊  
宣寧諸縣棄地漸圖恢闢高山聚落實鎮城兩腋  
東西虜衝募軍分駐則按伏之費省而犄角之勢  
成矣張文錦旣死李瑾又死此非細創征之不克  
撫之不輯用夏從夷爲禍尤棘正綱紀布恩信化  
頑嚚潛消默奪不震不竦非英毅忠誠之士不可  
歷朝賜勅通書納貢市馬弘治中許進巡撫時三

貢皆不可謂非策昔魏尚李廣皆守雲中尚給士  
卒饗軍吏無所不至廣遠斥堠就水草頓止人人  
自便是以能用其衆以制匈奴撫臣守將不能不  
勞拊髀之思矣

### 榆林

榆林舊治綏德棄米脂魚河地幾三百里成化九  
年都御史余子俊議徙鎮榆林堡內地稍安又築  
邊牆自黃甫州西至定邊營亘千二百餘里連墩  
勾堡橫截套口內復塹山湮谷是曰夾道得地利  
焉虜遂不敢輒渡河我得耕牧套內益以樵採圍

獵之利稱雄鎮焉當是時寧夏巡撫徐廷璋亦修  
邊虜不復入套者二十餘年久之玩弛墻薄溝淺  
虜遂以套爲巢穴成化弘治正德屢有搜套之議  
或謂當尋漢唐受降舊城又謂當復守東勝東路  
可無虜患然用人理財宜在所先審時度勢未易  
言也我兵日斂虜巢日深諸利皆失鎮城四望白  
葦黃沙地無產穀商無通貨一切芻糧仰給腹裏  
弘治正德中布政使文貴侍郎馮清改本色爲折  
色重以災蠲民逋動計百萬以故軍用大窘有米  
珠芻桂之誑即虜壓境據魚河我餉道遂絕此時

予金如山亦不可食倪岳許論嘗欲通舟河渭轉  
漕邊鎮此經史所載非鑿空之說也榆林地險將  
士懷忠畏法死無怨言又果悍敢勇戰不貫胷虜  
呼爲駱駝城人馬見則畏之四方征調所向有功  
更多將材有節氣視他鎮爲最

寧夏

寧夏賀蘭山環其西北黃河繞其東南險固易守  
沃土長流生理饒洽成化前虜患多在河西虜旣  
入套河東三百里花馬池清水營左右反爲敵衝  
自巡撫徐廷璋築牆總制楊一清王瓊屢增築更

益敵臺足禦小寇顧兵寡勢分虜大舉輒不能過  
嘗聞弘治前虜不戀套或連歲不至卽至在水堅  
時凍解不能復出入以故每歲水時伺虜入則戒  
嚴出卽否乃今渾脫飛渡數萬立濟據爲巢穴誘  
我逋逃盡知內地虛實咸寧固靖不得休息許論  
欲擇花馬池便利之地建城堡設叅遊移總制居  
之而分屯重兵清水興武諸營令二百里內旗幟  
相望刀斗相聞鐵柱白水諸堡水草大路盡築墩  
堡可謂扼吭之計東援榆林西援寧夏亦常山蛇  
勢也論又曰往時虜出入河套犯甘涼皆由賀蘭



山後自總兵杭雄敗後遂出山前趙瑛周尚文禦之皆敗由此不已不知寧夏所終也王瓊廢鎮遠關而城平虜棄地蓋八十里以故虜患愈近而民利益窘中衛偏在西隅雖地狹易守顧山後之虜窺靖虜者數數有之尋討故事云自賀蘭山直西至鎮番內皆漢朔方地今棄與虜城而守之莊涼靖固皆安枕矣

### 甘肅

甘肅即漢河西四郡斷匈奴右臂者也蘭州爲金城渡河西六百餘里至涼州爲武威又西四百餘

里至甘州爲張掖又西四百餘里至肅州爲酒泉又西出嘉峪關爲沙瓜赤斤苦峪以至哈密諸城皆燉煌地也洪武五年宋國公下河西遂棄燉煌關嘉峪自莊浪而南三百餘里爲西寧古湟中也自涼州而北二百餘里爲鎮番古姑臧也夫以一條之路孤懸幾二千里西控西域南隔羗戎北遮胡虜經制長策自古爲難且哈密甘肅藩籬諸番領袖成化以來陷於土魯番恢復之策屢勤朝議胡世寧論之悉矣亦不刺阿爾禿斯二寇盤據西海吞并屬番爲西南患頃許亦不刺內附尋以敗

弱故棄不納似爲失計正德中土魯番兩犯甘肅彭澤陳九疇皆以忠勇獲罪貽笑奸夷漸不可長若收海上之虜置哈密近境結以恩信西制土番北制瓦剌此千載一時也倘有成績卽令職西域之貢何所不可議者祇云戎心叵測而不知窮虜易用乃今自據西海散處河岷阻扼成祖以夷治夷建寺立僧有深恩焉西域稱王數十貢文數百紙繹騷無厭苟不徵勅給符限年勒名坐困中土矣嗟乎河西危則洮岷臨鞏漸被其禍關西隴右憂方棘也

### 固原

固原本開城縣套虜未熾專備靖虜一面平固安會間稍得休息弘治十四年火篩入寇內郡遂爲虜衝始改立州治設固靖甘蘭四衛統以總制叅遊與寧夏爲唇齒塞上人謂花馬池諸城爲大門若併力堅守花馬池固原可無虞而響石溝至靖虜諸堡修築亦在所緩蓋力分則勢弱寇已入門主人束手故總制不駐花馬池固原未可息肩也每黃河水合靖虜南北一望千里坦如平地若賀蘭山後之虜履水南下蘭靖安會卽爲禍階調兵

防守候在冰凍而西鳳臨鞏之卒多未經戰豈能  
捍禦不添沿河之堡不屯常戍之兵固原亦未可  
息肩也

### 三邊四鎮

陝西三邊列鎮曰延綏寧夏甘肅固原延綏東黃  
甫川至定邊營千二百里西接寧夏花馬池出花  
馬池至橫城三百二十里東至黃甫川千五百二  
十里皆在河內邊牆外悉爲河套套長幾二千里  
橫自牆距河遠八九百里近二三百里惟黃甫川  
八九里爾川南焦家坪兩岸夾山水先合後泮娘

娘灘羊圈子渡口冬水涸虜每二三年或四五年  
大衆自坪或灘或渡口入套每遣零騎伏林逐草  
往來不絕是以套中無歲無虜由橫城渡河而西  
爲寧夏鎮城鎮城至鎮遠關二百四十里中衛四  
百里在河外賀蘭山後虜時住牧警報屢至由鎮  
城渡河東入靈州至韋州三百四十里韋州南接  
固原預望城至固原鎮城三百里由固原出靖虜  
之蘭州七百二十里河州九百二十里皆在河內  
套虜秋由花馬池潰牆入山後虜冬由靖虜衛踏  
冰入則臨鞏涼慶諸郡縣皆繹騷矣由蘭州渡河

西出莊浪至甘州鎮城一千二百里至嘉峪關六  
百里皆在河外西海有虜寇土魯番天方西域有  
西夷西寧莊浪華咂章咂等族有番落酒泉浩疊  
之間環而居者皆犬羊也延綏鎮一千二百里寧  
夏鎮一千二百二十里固原鎮一千三百里甘肅  
鎮一千八百里通計五千六百餘里

六關

直隸三關  
山西三關

居庸

紫荆

倒馬

居庸隸薊州紫荆倒馬隸保定鴈門偏頭寧武隸  
山西巡撫居庸諸關本太行山與鴈門諸山相斷  
數百里鴈門巨南北太行絕東西表裏縱橫左右

縈帶闕狄藩華險由天造山西自井陘西北數百  
里崇岡複嶂扼爲居庸迤邐東折玉帶神嶺諸山  
若拱若抱八陵在焉外拒四海冶潮河川古北口  
去虜不遠故居庸爲京師北門居庸左轉蓋漁陽  
盧龍當山海之際古渝關也控約遼東西右循太  
行西南以往包絡數十城皆平原沃野北倚上谷  
雲中皆宿重兵居庸東去舊有松林數百里中有  
間道騎行可一人即札八兒導元兵趨南口者紫  
荆倒馬二關隘口旣多守備不能專內連真定保  
定大名古燕趙之郊平夷曠衍無高山大陵爲之

限隔騎兵便馳逐南並井陘出山西路險隘士馬不能成列東更順德廣平遂入齊魯下江淮鴈門三關山東起代郡外斷雲中內畧太原北境西盡雍河之濱鴈門稱絕險虜入大同川二邊不能守則鴈門當其衝寧武諸營堡不甚險隘虜往往由蕎麥川野猪口入婦女畜產驅逐已出塞而遊兵百里赴援難矣偏頭地平可馳馬故多虜患西北冬備河曲東北時時備大同川往時諸險塞設關羅夫環戈戍卒荷戟守吏辨符行者脅肩曳踵左右森立正德以後商者入賂逋者奸闌廢墜缺斤入至居京師習兵器市禁物群來旅往如履康衢防哉防哉

左右環立不問誰何況覈符券嘉靖以來虜細出入至居京師習兵器市禁物群來旅往如履康衢防哉防哉  
論曰虜莫強於遼金元莫弱於我 朝國初胡裔半留中國遞還沙漠者無幾末樂四出塞虜益遠徙死者降者又半以故我塞上戍兵不及四十萬虜今東得開平興和西據朔方東勝皆水草善地自末樂迄今未嘗一遭敗衄生聚旣蕃侵噬漸近也先火篩之後益輕中國恃其長技往往深入風雨飄忽動輒數萬我軍禦之不過依險結營以防

衝突僅不亂行即爲全勝虜志日驕我氣日奪其  
零賊出沒雖稍有俘斬亦已其難蓋衆寡之勢殊  
強弱之形異也幸其狼婪鼠竊無有他志計日數  
程不能持久每一大舉驪肉賸馬頗有勞費若得  
矢不雙言則懊悔無已是以邊境得苟免焉近年吉  
囊俺答屢入內郡飽掠而歸聚兵十萬莫敢發一  
矢而輒張捷冒功上下相蔽甚至殺歸正人爲首  
功冤酷已極今虜中控弦之士餘二十萬益以中  
國逋逃竊知內地虛實一旦改慮外變內憂禍不  
細也

### 附夷官考

土官初隸吏部驗封洪武三十年凡掌土兵者改  
隸兵部其襲替關武選大抵與驗封不異洪武中  
土官無子弟其壻與妻皆得襲永樂中襲替人文  
出十年者亦聽然皆萬里赴闕或獻馬方物請命  
最謹天順八年三月上 兩宮徽號詔許土官繳  
呈勘奏即與冠裳於是介使未將威福自恣雖托  
羈縻之名竟開驕悍之漸成化十五年又有納穀  
備賑之令則經制日卑規取愈陋 孝宗末年發  
憤釐革至正德旋復墮廢嘉靖九年始曲爲條約

稍復 祖宗之舊今攷府州縣正貳幕屬巡檢驛  
傳凡三百六十隸驗封宣慰宣撫招討安撫長官  
凡一百三十二隸武選隸驗封者皆領於布政司  
武選所隸或領於都指揮使司文武相維機權攸  
寓細大相關掌股易運數年來鎮撫巡部諸臣建  
白日煩紛更已甚矣雲南本徼外地 國初元孽  
竊據戊申開基尚阻聲教王禕秉義捐軀傳友德  
沐氏父子兄弟威戢惠戢梅思祖張統繼膺藩屏  
平徭均賦疆土稍開顧其人慄悍不得已因俗爲  
政官其酋領稍示安輯元江永寧鎮沅孟良景東

最强獮鎮南蒙化順寧霑益差小然皆向背靡常  
調劑爲難諸甸約攝騰衝諸羅窺竊尋靖蓋自麓  
川虛耗中土孟養曲徇奸夷正統迄今益復反復  
况投筐非人刑法好貨湖南滇北將有梗隔之憂  
至求馬湖建昌川陸達道計亦晚矣貴州本西南  
夷羅施鬼國 國初霽翠朱欽歸附仍其世官山  
峭地瘠夷情猾詐分隸川湖雲南永樂癸巳始立  
三司當時顧成易節以文武大吏威懷有方時稱  
馴順然壤地聯絡衝胸掣肘自泗城北窺永寧芒  
部南擾畢節西播外突普凱內潰交讒構亂喜禍

佳兵每一梗阻滇南中斷乃知分割三隸疆域相牽不可謂非策也湖廣土官皆據湖南古巫黔中地中錯辰常外聯川貴溪峒險深難擾易亂彭氏富强雄脅諸司自宋迄今構結滋廣驕橫益堅國家稍有征誅輒議調發所過殘破慘於劇盜官司莫敢誰何嘉靖中王守仁討岑氏時湖臬僉事汪溱統馭嚴飭所過戢歛以故順靖之禍不獨湘楚永寶之憂豈直苗夷也廣西當嶺南右偏土瘠民獷視東道特異諸夷窟穴盤繞其間左黔右鬱荔浦東西殘破不可言大藤峽深險尤甚成化中誅

鋤極慘近復跨江倚山出沒剽奪田寧梧藤諸孱卒竟不能扼制桂林之北六峒為孽則北連武岡柳慶之西八寨尚存則東通懷遠府江上下半為夷巢寇竊無虛日右江岑氏猛賊雖誅餘孽尚在王盧再叛思田更强姚鎮勦則黠兵守仁撫則納侮恐數年之間復煩經畧爾四川山包劔棧水鎖瞿峽襟帶擁束是為天險惟烏蠻阻其東南蔓繞西抵番族欲其馴順是在調擾龍州為松番咽喉每渡我餉道烏蒙烏撒芒部諸府雖仰我鼻息而內黨日堅數啓隙亂唇齒之勢彼得挾而擾我叙



瀘之間宜有機權携其醜類若乃碣門遠引諸番  
播州旁通四省所謂與蜀盛衰者也

雲南一百五十一武定麗江景東沅江順寧永寧  
鎮沅蒙化孟良孟定知府十人寶山南甸蘭州灣  
甸寧州富州北勝大侯雲龍浪蕩鄧州安寧威遠  
霑益羅雄鎮庫陸涼知州十七人臨西嶲峨雲南  
亦佐羅次元謀知縣六人廣南姚安府同知二人  
鶴慶府知事一人千厓宣撫經歷一人巨津師宗  
浪蕩通安北勝鎮南姚州順州同知八人北勝南  
安鎮南州判官三人雲南楚雄亦佐易門定邊永

平縣丞六人昆明雲南廣通嶲峨定遠楚雄主簿  
六人威遠州吏目一人五井順盪鹽井副使二人  
速爲古刺騰衝樣備觀音山沙橋德勝關泔西在  
城打牛坪晉寧易龍驛丞十二人金齒水眼鄧川  
州寧番順寧尋甸禾摩村東山口浪滄江師井打  
牛坪盪井金沙江十二關備溪江青索鼻納更山  
蒲陀崧鎮南箭桿場關索嶺鐵爐清水江黑鹽井  
西金沙江赤水鵬定西嶺龍街關蔓神寨餘白水  
關南平關黑鹽井阿雄村戛賴元江禾摩村安南  
坡祿腰煉象關楚雄縣松詔鋪觀音山鳳羽鄉東

金沙江回登關湯池英武關巡檢四十五人

改流二十五知府三人鶴慶尋甸廣西知州四人

馬龍彌勒維摩阿迷知縣二人路南蒙自府同知

一人楚雄府照磨一人麗江典史一人浪穹鹽井

副使一人彌沙驛丞五人永平孟哈潞江羅卜思

庄雲南巡檢十二人宣化關甸頭樣備神摩洞下

江南安州普昌石門關彌沙井雲龍甸煉象關楚

場

貴州一十五鎮遠府同知一人鎮遠府通判一人

鎮遠府推官一人安順州同知一人普安州判官

一人婺川縣丞一人黃沙渡瓮城河盤江谷龍的

澄河覃韓偏刀水巡檢六人司獄一人 改流二

知縣一人婺川巡檢一人都儒五堡三坑

廣西一百九十七思恩田州思明鎮安知府四人

思明結安下石西利州都結奉議思城上思龍英

鎮遠江州結倫思同果化都康茗盈萬承全茗上

下凍泗城太平向武南丹歸順安平萬承忠州思

陵龍州歸德那地東蘭上隆知州三十三人左州

同知一人羅白馮祥上林陀陵羅陽忻城知縣六

人上林縣丞一人懷遠主簿一人桂平貴溪典史

二人永平寨波羅里大洞三寨鎮安平鄉理源鎮  
高井寨尖山鎮周冲都樂壩古江口羅目鎮慈樂  
寨東鄉巡檢十三人木盤浦鎮鄒寨白石寨單觀  
旺思隆鄉連城鄉武羅鄉武林鄉辛安寨東禪鎮  
那龍寨太約鎮寨下市界牌鎮安城鎮歸仁鎮古  
眉寨群峰寨白面寨遷隆寨西舍寨麗壁市桑江  
口古皆鎮三畔鎮三門灘鎮大寧寨龍門寨靖寧  
鄉宜良鎮都博鎮新興鎮歸化鎮吉清鎮廖洞鎮  
江口鎮章路鎮安相鎮樂善鎮莫離鎮武陽鎮中  
峒鎮通道鎮清流鎮思管鎮鸞頸隘保江鎮西峒

鎮潯江鎮萬石鎮安永鎮縣廓鎮清水鎮李廣鎮  
思龍鎮東江鎮德勝鎮大曹鎮思農鎮北蘭鎮安  
化鎮普義鎮吉定鎮歸思鎮上堡鎮金城鎮方村  
蒙村窮果兩江口峯門寨南源寨常安鎮龍平寨  
西嶺寨鎮峽寨白霞寨邊逢寨信都鄉沙田寨樊  
冢寨白花洞口渠樂寨金城寨八尺寨那樓寨橫  
山寨南鄉南里鄉大宣鄉馱演寨鵝頸鎮都名鎮  
丹陽鎮周冲大宣鄉靖寧鄉大黃江口北山懷遠  
鎮湘山渡副巡檢一百二人 嘉靖七年初設武  
靖知州一人田州吏目一人臨時岩馬甲大田子

甲楊院思郎累彩怕河武龍拱甲床甲婪鳳下隆  
縣甲篆甲砦桑怕牙思幼候周思恩自興龍定羅  
定安古零舊城那馬下旺都陽巡檢二十八人  
改流四知州二人養利上石知縣二人崇善永康  
四川二十五烏撒芒部烏蒙東川知府四人東川  
府同知一人龍州判官一人龍州宣府知事一人  
馬湖把事一人信寧侮泥溪麻刺村昭平堡寒水  
寧戎明月三岔巡檢八人溪龍阿用祿馬蠻夷白  
水太平瀘沽驛丞七人 改流知府一人馬湖  
湖廣五南渭施溶上溪知州三人滑石江院場坪

巡檢二人

廣東一龍門縣巡檢一人 右隸吏部驗封

雲南布政司領宣慰司七宣撫司三長官司二十  
都司領安撫司三長官司三車里木那孟養緬甸  
老撾東里八百大甸為七宣慰南甸干崖隴川為  
三宣撫十二關納樓茶甸教化三部王弄山麝容  
甸溪處甸思陀甸左能寨落恐甸安南祿谷寨刺  
次河革甸香羅尾魯之因遠羅必甸馬龍他郎甸  
者樂甸鈕兀芒市為二十長官其都司領者安撫  
三路江鎮遠楊塘長官三茶山鳳汝施甸

湖廣都司領宣慰司二宣撫司四安撫司九長官  
司二十蠻夷長官司五永順保靖為二宣慰施南  
散民忠建容美為四宣撫東鄉五路忠孝忠路金  
峒龍潭大旺忠峒高羅桑植為九安撫臘惹峒交  
著黃洞驢遲洞施容施白崖峒田家峒五寨寧子  
坪搖把峒上愛茶峒劍南木冊鎮南唐崖椒山瑪  
瑙五峯石寶水盡源通塔平石梁下峒臻剖六峒  
橫坡等處為二十長官鎮遠隆奉西坪東流臘壁  
洞為五蠻夷長官

貴州布政司領宣慰司一安撫司一長官司五十

一蠻夷長官司二十都司領長官司十一

貴州宣慰金筑安擇貴竹水東青山劄佐龍里白  
納底寨養龍坑施溪黃道溪水德江蠻夷沿河柘  
溪備橋而阡苗民葛彰葛商龍泉坪銅仁省溪提  
溪大萬山平頭者可烏羅麻響木瓜大華上馬橋  
大龍番程番卧龍番小程番方番金石番韋番洪  
番盧番羅番廬山都勻平川六峒邦水豐寧平定  
樂平募役頂營十二營庫佐寧谷寨西堡為五十  
二長官中曹垂西都坪峩異溪都素朗溪鎮遠金  
容金達邛水十五洞澶溪八舟洪洲伯里曹滴洞

古洲西山陽洞湖耳亮泰歐陽新化中林驗洞赤  
溪浦洞龍里爲二十蠻夷長官其都司領者新添  
小平伐把平寨丹平丹行楊義樂平平伐大平伐  
平浪九名九姓獨山州爲十一長官

四川布政司領宣慰司一宣撫司二安撫司三長  
官司十二都司領宣撫司二招討司一安撫司四  
長官司二十二行都司領長官司五

播州宣慰永寧龍州爲二宣撫草塘黃平黎州爲  
三安撫泥溪平夷蠻夷沐川播州餘慶白泥容山  
真州重安九姓平茶峒爲十二長官其都司領者

石砮西陽爲二宣撫天全六番招討八郎改角寨  
麻兒者爲四安撫隴木頭靜州岳希蓬石耶峒邑  
梅峒占藏先結族臘匝族白馬路山峒族阿昔峒  
北定族麥匝族者多族牟力族班班族祈命族勒  
都族包藏族阿昔族思曩兒族阿用族潘幹寨壘  
奚鬱卽爲二十四長官

廣西布政司領長官司三永安上林安隆 右隸  
兵部武選

論曰明興平定四海凡夷獠蠻獠征徃之地西起  
巴蜀牂牁東抵湘楚包絡湖嶺東折而南南盡海

上又東跨百粵三江大者蕪據連城細者保持深  
箚雖稍奉約束要在羈縻而已然兵力稍健乍叛  
乍歸苟功率過濫拊懷失策雄圖自縮狡窟益深  
况地廣官高擅利習兵生齒益繁財貨益廣詐以  
謀成罪以功解種憂釀禍蔑玩中土未可謂無虞  
也嗟乎夏典要荒周官蕃鎮大抵因民順俗橫海  
伏波逾湟絕嶺輿地漸開化理終塞乃知天德無  
私王道有量闢國陋於綏人曲防窘於曠度苟醜  
類自獲飽煖中華不患荼毒吾又何求焉惟夫吏  
好蓄積政多解弛或遠嫌自潔或求勝喜功於是  
侵警日聞師徒數起網漏網頽夷夏並困茲欲收  
總長策用圖久安必畫正疆理則鄰族靡爭預陳  
嫡孽則宗庶自定世及之際以時覈聞錢穀之輸  
一切報罷而又飭武事於節帥修文德於廟堂猾  
亂之憂斯其鮮矣


皇明地理述附夷官考終

子履準校正

皇朝地理志

卷一

一



皇朝地理志  
卷一  
一



